



PENDUDUK DI MALAYSIA



Penduduk di Malaysia terdiri daripada pelbagai kaum dan bangsa. Mereka tinggal di seluruh pelosok negara. Namun, terdapat kawasan yang padat penduduk dan juga kawasan yang jarang penduduk. Mengapakah keadaan sedemikian berlaku? Mengapakah terdapat kawasan di negara kita yang tidak mempunyai penduduk?



Standard Pembelajaran

Pada akhir pengajaran dan pembelajaran murid dapat:

- Menjelaskan dengan contoh taburan penduduk di Malaysia.
- Membincangkan faktor-faktor yang mempengaruhi taburan penduduk di Malaysia.

1.

Taburan penduduk



Adakah bilangan penduduk Malaysia di setiap negeri sekata?



2. Faktor yang mempengaruhi taburan penduduk



Mengapakah kepadatan penduduk di kawasan luar bandar tidak padat berbanding penduduk di kawasan bandar seperti Bandaraya Kuala Lumpur?



8.1

TABURAN PENDUDUK DI MALAYSIA

Taburan penduduk merujuk kepada sebaran penduduk di sesuatu kawasan atau negara. Menurut sumber Jabatan Perangkaan Malaysia, anggaran jumlah penduduk Malaysia pada tahun 2016 adalah seramai 31.7 juta orang. Taburan penduduk di Malaysia tidak sekata. Secara umumnya, terdapat kawasan yang berpenduduk padat, sederhana dan jarang. Peta 8.1 menunjukkan taburan penduduk di Malaysia.

1 Kawasan Berpenduduk Padat

- Menjadi tumpuan penduduk kerana kawasannya rata dan subur serta sesuai untuk pelbagai kegiatan seperti pertanian, perindustrian, perniagaan dan perlombongan
- Antara bandar utama yang berpenduduk padat ialah Wilayah Persekutuan Kuala Lumpur, Shah Alam (Selangor), Kuching (Sarawak), Kota Kinabalu (Sabah), Ipoh (Perak), Alor Setar (Kedah) dan Johor Bahru (Johor)



Bandaraya Kuching, Sarawak

Bijak IT

Ketahui Dasar Kependudukan Negara melalui laman web yang berikut. Buat catatan dan pameran di sudut maklumat kelas anda.

Sumber: <http://eravisi.com/geo/tg1/ms026>



Jumlah penduduk Malaysia sehingga bulan Julai 2016 berjumlah kira-kira 31.7 juta orang. Apakah yang akan berlaku jika jumlah penduduk Malaysia mencecah 70 juta orang?

Sumber: Jabatan Perangkaan Malaysia



2 Kawasan Berpenduduk Sederhana

- Banyak tertumpu di kawasan pertanian, pesisir pantai dan bandar kecil
- Antara bandar berpenduduk sederhana ialah Tumpat (Kelantan), Dungun (Terengganu) dan Felda Tunku (Sabah)



Tumpat, Kelantan

3 Kawasan Berpenduduk Jarang

- Tertumpu di kawasan yang berhutan tebal dan kawasan tanah tinggi
- Melibatkan kawasan pergunung-ganang dan kawasan pedalaman
- Antara kawasan berpenduduk jarang ialah Tasik Banding (Perak), Kuala Tahan (Pahang) dan Kapit (Sarawak)



Perkampungan Orang Asli




Formula kepadatan penduduk.

Kepadatan penduduk : $\frac{\text{Jumlah Penduduk (orang)}}{\text{Keluasan Kawasan (km}^2\text{)}}$

Padat: lebih daripada 200 orang bagi sekilometer persegi

Sederhana: 50 – 200 orang bagi sekilometer persegi

Jarang: kurang daripada 50 orang bagi sekilometer persegi





8.2

FAKTOR-FAKTOR YANG MEMPENGARUHI TABURAN PENDUDUK MALAYSIA

Taburan penduduk di Malaysia yang tidak sekata dipengaruhi oleh faktor-faktor tertentu. Keadaan tersebut secara langsung akan mempengaruhi perkembangan dan pembangunan bagi sesuatu kawasan. Faktor-faktor yang mempengaruhi taburan penduduk di Malaysia merangkumi faktor fizikal, ekonomi, sosial dan dasar kerajaan/governan.

Tanah Pamah

- Kawasan tumpuan penduduk kerana sesuai untuk pelbagai aktiviti ekonomi dan kawasan petempatan
- Sebagai contoh, kawasan Dataran Kedah–Perlis dan Dataran Kelantan merupakan kawasan pertanian
- Antara kawasan tanah pamah yang menjadi bandar, ialah Seremban (Negeri Sembilan), Petaling Jaya (Selangor) dan Sibu (Sarawak)



Seremban, Negeri Sembilan

1 Faktor Fizikal

Tanah Tinggi

- Kawasan ini kurang menjadi tumpuan penduduk akibat **darjah ketersampaian** yang rendah
- Kawasan kediaman juga sukar dibina dan memerlukan kos yang tinggi kerana bentuk muka bumi yang tidak rata
- Kawasan berpenduduk jarang melibatkan kawasan banjaran di Malaysia, contohnya Ulu Tembeling (Pahang), kawasan Banjaran Kapuas Hulu (Sarawak) dan Banjaran Tahan (Pahang)

Pinggir Laut dan Saliran

- Kawasan yang berpenduduk padat dan sederhana padat
- Menjadi tumpuan penduduk akibat pengaruh kegiatan ekonomi perikanan dan pertanian
- Kawasan pesisir pantai dan sungai menyediakan kemudahan perhubungan yang baik seperti di Besut (Terengganu), sepanjang Sungai Rajang (Sarawak) dan Sungai Kinabatangan (Sabah)
- Terdapat juga kawasan berpenduduk jarang terutama di kawasan berpaya, contohnya sekitar Tasik Chini dan Tasik Bera (Pahang)

Glosari



Darjah

Ketersampaian: Keadaan atau kuantiti yang menggambarkan cepatnya sesuatu lokasi dapat

Infrastruktur: ditujui dari lokasi lain dan dengan itu memudahkan pertemuan dan interaksi

Kemudahan atau perkhidmatan asas untuk membangunkan sesuatu masyarakat



Pertanian

- Kegiatan pertanian di Dataran Kedah–Perlis, Dataran Kelantan dan Delta Rajang menjadikan kawasan tersebut berpenduduk padat

Perlombongan

- Kegiatan perlombongan petroleum dan gas asli di Kerteh (Terengganu) dan Miri (Sarawak) menyebabkan kawasan tersebut menjadi tumpuan penduduk



Kerteh, Terengganu

2 Faktor Ekonomi

Perikanan

- Kawasan perikanan juga menjadi kawasan tumpuan penduduk
- Kawasan perikanan berpenduduk sederhana padat, contohnya Semporna (Sabah), Tumpat (Kelantan) dan Kemaman (Terengganu)

Perindustrian

- Sektor perindustrian mampu menyediakan peluang pekerjaan yang menggalakkan penghijrahan penduduk
- Sebagai contoh, kawasan perindustrian di Bayan Lepas (Pulau Pinang), Shah Alam (Selangor), Batu Berendam (Melaka) dan Nilai (Negeri Sembilan)

3 Faktor Sosial

Infrastruktur

- Kawasan yang mempunyai kemudahan seperti bekalan air, elektrik, kemudahan telekomunikasi serta kemudahan pengangkutan menjadi tumpuan penduduk
- Kawasan pedalaman berpenduduk jarang kerana tidak mempunyai kemudahan sosial yang lengkap

Pendidikan

- Kawasan yang mempunyai kemudahan pendidikan seperti pusat pengajian tinggi menjadi pilihan
- Sebagai contoh, Universiti Pendidikan Sultan Idris (UPSI), Tanjung Malim (Perak) serta Universiti Teknologi Malaysia (UTM), Skudai (Johor) dan Universiti Kebangsaan Malaysia (UKM), Bangi (Selangor)



Universiti Pendidikan Sultan Idris (UPSI), Tanjung Malim, Perak



Sekiranya anda diberi pilihan untuk tinggal di sesuatu kawasan, kawasan manakah yang akan anda pilih? Terangkan sebab-sebab anda memilih kawasan tersebut.



Pembukaan Bandar Baharu

- Pembukaan bandar baharu dapat menarik lebih banyak penduduk berhijrah
- Perpindahan pusat pentadbiran persekutuan ke Putrajaya menyebabkan kawasan tersebut berpenduduk padat



Putrajaya

4 Dasar Kerajaan/ Governan

Pewartaan Hutan Simpan dan Taman Negara

- Langkah kerajaan mewartakan kawasan tertentu sebagai hutan simpan dan taman negara demi **kelestarian** alam menjadikan kawasan tersebut berpenduduk jarang
- Sebagai contoh, Taman Negara (Pahang), Taman Negara (Pulau Pinang) dan Hutan Simpan Royal Belum (Perak)



Hutan Simpan Royal Belum, Perak

Tanah Rancangan

- Pembukaan kawasan pertanian melalui Rancangan Tanah Persekutuan (FELDA) menyebabkan kawasan tersebut berpenduduk sederhana padat
- Sebagai contoh, kawasan Felda Kampung Sertik (Pahang) dan Felda Sahabat (Sabah)



Kawasan perkampungan FELDA

Glosari



Kelestarian: Keadaan (hutan, persekitaran dan lain-lain) yang tidak berubah atau yang terpelihara seperti asal

Governan: Fungsi yang berkaitan dengan dasar kerajaan dan pentadbiran



Kemajuan teknologi memungkinkan kawasan pedalaman diteroka untuk tujuan petempatan manusia. Terangkan sejauh mana kemajuan teknologi dapat mengubah kawasan berpenduduk jarang kepada kawasan berpenduduk padat.



Mahir
Diri

Pilih satu kawasan di Malaysia dan kenal pasti taburan penduduk di kawasan tersebut. Jelaskan faktor-faktor yang mempengaruhi taburan penduduknya.





Penduduk di Malaysia

Taburan Penduduk

Penduduk padat

- Lebih daripada 200 orang bagi sekilometer persegi

Penduduk sederhana

- 50 hingga 200 orang bagi sekilometer persegi

Penduduk jarang

- Kurang daripada 50 orang bagi sekilometer persegi

Faktor yang Mempengaruhi Taburan Penduduk

Fizikal

Bentuk muka bumi:

- Tanah pamah
- Tanah tinggi
- Pinggir laut dan saliran

Ekonomi

- Pertanian
- Perlombongan
- Perikanan
- Perindustrian

Sosial

- Infrastruktur
- Pendidikan

Dasar Kerajaan/ Governan

- Pembukaan bandar baharu
- Pewartaan taman negara dan hutan simpan
- Tanah rancangan

Penduduk Malaysia yang berbilang kaum hidup bersatu padu. Oleh itu, Malaysia dapat berkembang maju dalam pelbagai bidang.





Cabaran Prestasi

A. Lengkapi jadual di bawah.

Ciri Taburan Penduduk	Kepadatan
1. Lebih daripada 200 orang bagi sekilometer persegi	
2. 50 hingga 200 orang bagi sekilometer persegi	
3. Kurang daripada 50 orang bagi sekilometer persegi	

B. Cari perkataan tersembunyi berpandukan petunjuk yang diberikan.

Petunjuk

1. Kawasan berpenduduk melebihi 200 orang bagi sekilometer persegi.
2. Tertumpu di kawasan pertanian.
3. Nama tempat berpenduduk jarang.
4. Bentuk muka bumi yang menjadi tumpuan penduduk.
5. Faktor taburan penduduk yang berkaitan bentuk muka bumi.
6. Kawasan berpenduduk sederhana padat di pesisir pantai akibat pengaruh aktiviti ini.
7. Kemudahan bekalan elektrik, air dan telekomunikasi.
8. Berkaitan peranan yang dimainkan oleh pihak berkuasa.
9. Pembukaan kawasan baru untuk kegiatan pertanian.
10. Faktor yang melibatkan pusat pengajian tinggi awam dan swasta.



K	H	I	F	S	E	K	A	P	I	T	A	F	G	T	O	K
T	A	N	A	H	R	A	N	C	A	N	G	A	N	A	Z	G
E	K	U	A	L	A	S	E	L	K	E	D	F	T	N	S	O
H	P	E	R	I	K	A	N	A	N	H	I	N	I	A	A	V
I	A	P	Z	P	H	R	A	L	K	D	U	P	M	H	T	E
D	G	B	E	A	P	O	K	Z	A	J	O	N	P	P	U	R
S	O	S	I	A	L	A	E	N	Z	A	H	Q	W	A	M	N
C	O	E	R	D	F	N	A	Z	L	Y	R	X	G	M	A	A
D	T	S	R	F	E	H	L	A	T	A	S	S	G	A	Y	N
P	X	T	I	H	R	U	A	T	T	L	K	E	A	H	I	I
A	K	R	Y	E	T	G	N	N	A	A	T	I	N	L	F	S
D	I	O	D	N	L	K	I	C	U	M	A	K	Z	A	M	A
A	O	E	L	U	M	A	T	E	D	A	U	H	U	I	K	S
T	S	F	Z	G	A	H	A	D	A	U	V	E	P	R	F	U
S	R	I	I	N	S	F	R	A	S	T	R	U	K	T	U	R

- C. Bahagikan kelas kepada beberapa kumpulan. Setiap kumpulan diminta mengumpulkan maklumat tentang salah satu faktor yang mempengaruhi taburan penduduk di Malaysia. Bentangkan hasil dapatan kumpulan masing-masing di dalam kelas.
- D. Lakukan pemerhatian berkaitan dengan jenis taburan penduduk di kawasan tempat tinggal anda. Nyatakan faktor-faktor yang mempengaruhi taburan penduduk tersebut.

